



Comunicat stampa per la conferenza stampa de nuœi 16 d'auril 2024

## La petizion dal majer suzes tl Aut Adësc: 70.000 sotscriziuns per la grupa dl Saslonch!

**70.000 zitadines y zitadins, sustenì da na gran cumpeida de lies per l'ambient, lies da mont y per l clima, à firmà. Chësc ie n sèni sterch de ulentà dla popolazion y n gran duvier per la politica, de mèter al plu prësc la grupa dl Saslonch cun i plans de Cunfin y la Zità di Sasc sota scunanza te n parch naturel!**

Per la grupa Nosc Cunfin deberieda ala lies che nes sustèn, sciche CAI AA, AVS Aut Adësc, Lia per Natura y Usanzes, Lia da Mont, Heimatpflegeverband Südtirol HPV, Dachverband für Natur und Umweltschutz DNU, Mountain Wilderness, Climate Action Aut Adësc, Vereinigung Südtiroler Biolog:innen, LIPU, WWF Trentino Alto Adige, Oldies for future, Lia uciei y la Arbeitsgemeinschaft für Vogelkunde und Vogelschutz dl Aut Adësc, iel na gran legrëza pudèi cunedì, che l'azion de abiné adum sotscriziuns à arjont na majera cumpèida che n ne se èssa mei aspità.

La petizion sun internet „**Save the Dolomites**”: **Gruppo del Sassolungo in pericolo - Langkofelgruppe in Gefahr!**”, ie pieda via ai 2 d'otober 2023, cun l nvit ala zitadines y ai zitadins de dé ju si stima per mèter **sota scunanza la grupa dl Saslonch, cun i doi monumënc naturei i plans de Cunfin y la Zita di Sasc.**

### **N suzes de maruëia per la grupa Nosc Cunfin y n gran duvier per la politica**

Pra la conferenza stampa da nuœi, cun la presënza dla presidëntes y di presidënc, nsci sciche la rapresentantes y i rapresentanc dla lies, ons pudù cunedì, che la **petizion online à arjont 70.000 + sotscriziuns**. Ntant che tl Aut Adësc se batun dassèn per arjonjer zifres da recort tl ciamp dl turismus y dantaldut pra i mplanç portamont, possa l'iniziativa de **Nosc Cunfin festejë de vester la petizion dal majer suzes dl Aut Adësc**. La presidënta dla grupa Nosc Cunfin Heidi Stuffer ie dastramp cuntënta dl resultat: “La solidarietà y l susteni de sotscri la petizion nes mplenësc de legrëza y ti son veramënter recunescenc a duc chëi che à firma. La 70.000 sotscriziuns ie n sèni tler, che nosta ntenzion vën sustenida da truepsc.

Perchèl ulessan ti senti gra a duc chëi che à sustenì chësta azion. L ie veramënter na gran legrëza a udëi tan de jënt che se mpënia ativamënter, acioche la grupa dl Saslonch giate si meriteda scunanza. La gran partezipazion desmostra tan de persones dl Aut Adësc y mo sëura i cunfins ora, che à l snait de se mpenié per la natura y i crëpes che ie n bën de duc, n sëni che la jent uel rujené pea. La sotscrizioms che ie unides abinedes adum avrà na valuta mpurtanta, acioche la dumanda de fé na vela per la popolazion vënie tosc a sl de. Nëus stajon cun fermëza dovia, per arjonjer nosc traviert.

**Purtruet ne n'ons nchina ncuei mo nia giapà n'audienza dal presidënt dla pruvincia Arno Kompatscher.** Perchél sons ncuei tlo per di ora adaut, che **aspiton inant che la jonta provinziela nes scota su y pea do la petizion da record!**

### **Bele dl 2022 online – pieda via la vela per stravardé i Plans de Cunfin**

Nchina ncuei ne n'iel mo nia uni metuda a jì na vela per la zitadines y i zitadins, da pert di chemuns. Perchél à la grupa Nosc Cunfin metu a jì na vela online: **“Nuëf cunliamënt danter Saltaria y Monte Pana – sci o no?”** Dla **1403** persones che à teut pert à **1109**, chël fossa **79%**, dit de **NO** a n nuef cunliamënt. Tl chemun de Ciastel fovel **53%**, te St. Chrestina **84%**, te Selva **88%** y a Urtijei **94%** contra l cunliamënt. Chemuns del Aut Adësc y mo autri chemuns ora dl Aut Adësc fova cun gran majuranza (92% y 97%) contra n culegamënt.

### **L cunsei provinziel fesc ora de nvie via ala scunanza!**

L cunsei provinziel à de setëmbër 2023 dit ora de sustenì i chemuns dl rajon ntëur i Plans de Cunfin, per arjonjer la scunanza. La dezijions vel ënghe sciche n duvier per i trëi chemuns de Gherdëina, chël da Ciastel y de Lajon, de lauré dl viers de na scunanza per duta la grupa dl Saslonch. La culaburazion danter pruvincia y chemuns vën sustenida finanzialmënter dala pruvincia, cun l fin de mëter a jì na vela per la popolazion.

Sce l ne n'essa nia da ruvé a chël, po ie la grupa Nosc Cunfin desposta a meter a jì na vela de si iniziativa.

### **Per ntëresc de loby ne dessa nia unida dunfrida la democrazia!**

Dal scumenciamënt d'auril lëura na grupa de lëur, che va sëura i chemuns ora, sciche udu dant dal Masterplan Vision Gherdëina, per i cunliamenc sun Mont de Seuc. La grupa scrisc: “La grupa de lëur cëla y valutea duta la puscibilibiteies y alternatives, da uni pont de ududa y te uni viers.” Dut de bela paroles, ma pra la prima senteda dla grupa ie bele unì presentà bën 6 prujec per n nuef cunliamënt danter Saltaria y Monte Pana. N muëssa tlo lecurdé che ti chemuns de Gherdëina iel bele unì fat ora trei iedësc (ti ani 2010 y 2013), de meter sota scunanza la grupa dl Saslonch. Te na letra à la grupa Nosc Cunfin scrit ai doi chemuns de Ciastel y de St.Chrestina, padrons di grunc, de jene dl 2024, critica de coche ie unida metuda adum la grupa de lëur. Te chësta **mancel defin la rapresentanza dla popolazion, la usc de plu lies de scunanza y de ambient, nsci sciche esperc de geologia, biologia, Raumplanung y mubiltá. Na regula, per la maniera de lauré de chësta grupa de lëur, dessa vester i “Gemeindeentwicklungspläne” che reverda la cuntreda**, ma che te Gherdëina muessa lauré sëura i cunfins ora: i plans de Cunfin dëssa tlo avei na valuta zëntrela.

I sostenideures dla sozieta, che uël bele dai ani fé l culegamënt danter Saltaria y Monte Pana, se nfida a di, “l ne vën nia giaurì nuëf rajons, me cunlia doi rajons da schi – chëi dai schi vën nsci spartì su, sun plu rajons y n possa nsci smendrì l trafich tla valeda y sun mont de Sëuc.”

Ma bele l “Landesbeschluss” dla pruvincia Nr.158/2018 „slarge ora de n rajon da jì cun i schi y culegamënt Saltaria\_Monte Pana”, ulache n fova defin a una, per nia lascé fé l culegamënt, iel scrit: **“L rajon dai schi vën valuta nsci, che l ie bele slargia ora asse.** Sce n uël fé nuef culegamënc, po muessa chisc purté pro a n miuramënt de qualita de **chëi lifc che ie bel y muessa uni valutei aldo dl Masterplan Vision Gherdëina**”. Per fermé nuef projec, muessa finalmënter unì straihei i cuntribuc provinziei, ora de mesura, per lifc y furnadoies!

### **La populazion dl post ie per straverdè i Plans de Cunfin!**

La majuranza dla zitadines y di zitadins che vif y lëura tlo uël che i Plans de Cunfin, tl cuer dla grupa de Saslonch, reste n post de ghèneda, zënza che i venie strabacei da nueva spiculazions turisticas. I dëssa resté na cuntreda ulache possa viver flora y fauna n pesc, ajache l ie bel dut nteurite rajons nuzei defin turisticamënter. N nuef culegamënt desdruj defin la cuntreda y ie n gran pericol per la fontanes da beber per l chemun de Urtijëi. La Mont de Pana dëssa resté inant n rajon de gheneda per families y l culegamënt te valeda dëssa unì miura.

La populazion uel rujené pea, pra la vela. Perchël iel gran ëura de mèter a ji na tel vela ti trei chemuns de Gherdëina.

Njonta:

- Valutazion dla nrescida online “Nuef culegamënt danter Saltaria y Monte Pana – sci o no?”
- N valguna testimonianzes da pert de partezipanc ala petizion.